

惠安縣志

(四)

惠安縣續志

嶺山何適訂正標點

爲宰不難。爲宰而周知一邑則難。旣知一邑而能立說著書實徵其蹟更難。所以一邑中疆域之廣狹，山川之形勝，戶口之登耗，賦役之厚薄，民生之利弊，風俗之淳漓，政治之得失，官司之賢否，欲一一了然於目，雖才智不凡，未必詳且盡也。夫如是而博採兼收，折衷至當，其曷可少哉？古者小史掌邦國之志，今郡縣志宗之。而唐李吉甫撰元和郡縣志亦謂志之設非徒誇摭撫之富，揆藻之工，其將信今傳後爲司牧者所考鏡，則舍志求治猶廢圭臬而測景棄模範而制器，未見其能善也。道光紀元之八年前，制府孫宮帥文靖公續修省志奏請

天子，檄下郡縣採訪以備纂輯。越三年，山陰婁君宰惠安，至則百務具舉，公餘延邑士，別類分門，補舊志之缺，爲十二卷。書成，敦敍於余。余考惠安自宋太平興國始縣，閱五百餘年，乃有明邑人張襄惠嘉靖庚寅八年志，又八十餘年。萬曆壬子四十年有宜春楊君續修之志。我

朝一修於雍正庚戌八年，王君澤椿再修於嘉慶癸亥八年，吳君裕仁今三十年矣。婁君復惴惴焉惟廢墜是懼而志乃成，由是行之已施之民，不易其俗，不易其宜，其尙慮有扞格之患哉？余意婁君於疆域思

封府之固於山川思防禦之周於戶口思教養之有方於賦役思催科之不擾與民之利而除其弊挽俗之漓而進於淳毋鷹厥政毋曠厥官百昌蕃育茂豫棣通一邑之人亦宜革薄從忠相與激勸用副賢有司求治之心則斯編之輯婁君所以殫其知而善夫治者可謂詳且盡矣余拭目觀政見難之不終於難而歎邑宰之好爲其難也豈獨惠安當若此哉

道光十三年福建鹽法道烏程王耀辰序

惠安縣續志序

惠安令山陰婁君明於吏治者也余任福建興泉永道過惠安問所以爲治則於一邑之民風土俗得失利病無不一一能言其隱心識之而不知其耽於文也今年春以所屬縣志乞序於余余謂縣之有志猶醫者之有方不得其方而欲爲良醫吾不信也惠安於泉郡爲屬邑於興化爲鄰邑下界晉江上界仙遊其土瘠其民勞其俗儉而嗇東南臨海民又以海爲田輕生逐利失利則流爲盜不得其方未見能治也婁君尹茲邑三載能撫字其民而民不爲奸今又簿書之餘與邑之士大夫續補此志其於惠安之民風土俗得失利病更詳且悉且可以貽後之爲治者觀婁君之志可以知婁君之用心矣顧史莫難於志爲

其詳或失之，泛也；簡或失之，略也。私或失之，去取不一也。惠安縣志撰自明萬歷間張少保岳，厥後知縣楊國章、王澤椿、吳裕仁俱有續修，計書三十六卷。今婁君又於前志所未錄未備及僞舛者續補刊正，輯十有二卷。余讀其書而知其搜羅之勤、考證之博也。三十年中近事無不備具，詳略去取悉求其當。以備通志國史之采擇，夫豈俗吏之所能爲哉！余承乏海濱，以廈金二島爲閩海要隘，不可以無志。凡島中之民風土俗得失利病亦頗一一具有條理，惜殺青未就，未及郵正。他日婁君過我，當與重加參訂。婁君固明於治而耽於文者，其必有以助我。

道光十四年春三月福建興泉永海防兵備道富陽周凱序

序

道光九年前制府孫文靖公將修通志檄各州縣搜訪舊聞上志局以備纂輯。而余適知惠安，因與紳士拾遺補闕爲志十爲卷，十二、十三年書成上之。序曰：惠安自宋太平興國六年分置縣，後越五百餘年至明嘉靖庚寅八年，張少保岳始輯縣志。維時深以遺落爲懼，以爲時久也。後八十餘年至萬歷壬子四十年，知縣楊國章續加編纂，紀載詳焉。迨我

朝康熙十七年海氛浸熾前志版籍俱燬於火至雍正八年距離萬歷壬子百二十餘年矣知縣王澤椿復行搜輯遺編墜簡賴以僅存然猶未授梓人也又越七十餘年至嘉慶八年知縣吳裕仁得其遺編復廣咨博採釐爲三十六卷夫志之難成如此蓋愈則愈難理勢然也今去嘉慶八年僅三十年爾自惠安修志以來未有如是之近者也故家遺俗流風善政猶有存者於遺佚乎何慮然余正慮其遺佚也古者小史掌邦國之志鄭氏注云志記也春秋傳所謂周志是也則當日志之在邦國者小史掌之志之在四方者外史掌之而天官司會掌逆四方之治鄭氏注云逆受而鉤考之也其鉤考之法以參互考日成以月要考月成以歲會考歲成蓋古者書藏於官官掌其書凡禮俗政事教治刑禁之書康樂和親安平之書及鄉老賢能之書邦中之板土地之圖史官莫不藏之是以積日而月積月而歲無不有以要其成而司會復以時鉤考之一國之事若網在綱有條不紊雖歷數十年或數百年無遺佚之患孔子修春秋猶見百二十國寶書豈非方志之歷久常存歟自秦漢以後官失其職書之藏於官者律令案牘之文耳又復無鉤考之責是以官書日漸零落而私門著述之學興言圖經者詳輿地而略傳紀志人物者詳事蹟而略典章途徑分歧而方志之體裁失矣卽有一二好古之彥留心掌故有意搜羅不數十年而老成凋

謝往事銷亡父老所傳聞之事至子孫而已無可考有志之士見典型之頓失欲採摭而無從往往增太息焉設使於數十年之間慮前聞之易失懼陳迹之易湮早爲纂輯勒成一書以傳於當時垂諸後世亦何至遺跡銷沉歸於烏有哉余承乏惠安竊思惠安負山瀕海前明以來亦多故矣至康熙二十二年以後海不揚波民生安居樂業沐浴

大化至百餘年之久靈和清淑之氣鍾爲人文積爲學業發爲事功雖離濟濟於斯爲盛矣而文物聲明黼黻潤色亦於今稱極盛焉夫際極盛之時而不及時編纂使信今而傳後斯亦長吏之過也余是以與邑之士大夫續前志之未錄補前志之未備正前志之譌舛勒成是編前志所詳者不載焉古者三十年爲一世今以一世而成是書亦不可謂之近矣使後之司斯土者仿小史外史之遺意隨時著錄歷世成書文獻之足徵將自惠安始豈可以其近而忽之哉若夫考政治之得失推法制之利弊斟酌損益以懲澆返樸前事之不忘後事之師也司牧者盍觀前志而推廣之變通之其則不遠矣

道光十三年知惠安縣事山陰婁雲謹序

惠安縣續志目錄

卷一 六—十

輿地志 道里 關隘 海防

卷二 十一—廿二

建置志 城垣 公廨 祠廟 學校 郵驛 橋梁 墳墓

卷三 廿三—廿八

政事志 戶口 田賦 鹽法

卷四 廿九—四三

禮典志 祭祀

卷五 四四—五十

職官志 知縣 巡檢 典史 教諭 訓導 場官 官績

卷六 五一—六一

選舉志 進士 舉人 貢生 恩賜 例職 武科 封蔭

卷七 六二—七六

人物志上 列傳 孝友 忠義 儒林 文苑 技術 方外

卷八 七七一—九四

人物志下 列女

卷九 九五一—一〇九

藝文志上 文

卷十 一〇一—一二五

藝文志下 詩 經籍

卷十一 一二六一—一三〇

金石志 石刻

卷十二 一二一

祥異志 人瑞

惠安縣續志卷一

輿地志

惠安自宋分置其山川封域前志載之詳矣然載封域而不載距省距京之道里則遠近不明也志險寨而不詳山陵之表裏志防海而不詳巡哨之法制則防範未周也惠安襟山帶海爲泉州東南之屏障幸際

太平無事而於廣輪之數險阻之形聯絡控制之方不豫爲籌焉豈守土之義哉今續志輿地之目三曰道里曰關隘曰海防

道里

東西廣九十里 南北袤九十里 至省城三百六十里 至京師三千三百九十里

以上四至

東曰小岞距縣四十五里其外大海 西曰螃蟹嶺距縣四十五里與晉江縣白洋界三十里 南曰北鎮距縣五十里與晉江縣洛陽界三十里至泉州府城五十里 北曰白水寨距縣四十里與興化

府仙遊縣楓亭里交界五十里 西南則虎窟嶺北與晉江仙遊兩縣交界三十里 東南則大岞崇武四十里外海 東北則沙格峯尾五十里外海 西北則東坑與仙遊縣下安里交界五十里 以上八到

關隘

陳同關在縣北白水鋪之南距縣治四十里元末鄉人築以禦寇明正統間知縣閉頑重建以兵守之地極險阨兩山對峙中間一路通南北僅容一肩輿北行十里卽仙遊楓亭有寨在山曰陳同寨

洛陽關在縣南通津鋪萬安橋北距縣治三十里爲洛陽街街末一關榜曰陽關巨鎮兩旁皆瀕海

國朝康熙十七年關外增築一小城西北據小石岡上環壓雉堞峙立三墩台四望無際東南抵海寨城雖小地極險要昔名塗寨今四面皆砌石關南卽洛陽橋橋行半里許爲晉江惠安交界石坊在焉崇武關卽宋小兜寨在縣東南距縣治四十五里明周德興始造城門樓窩鋪墩臺俱備設有營汛防守其巖內地則黃崎小岞輞川洛陽峯尾沙格臭塗獺窟藉爲捍衛外地則南日湄州永甯祥芝互爲聲援烽火相連緩急相應控制海外爲四方保障之重地

虎窟隘在縣西南山谷間崇山夾峙狹徑僅通人行明正統末沙尤擊作永春安溪相延而起始置寨柵發民卒以備狂狡是後聞東南警報輒備斯寨及事甯始撤備焉今其故址猶存

峯尾澳城在縣北上接南日湄州下通輞川崇武黃崎獺窟諸澳舟楫可達外洋澳極險要人居又甚稠密故設城置戍與各澳互爲犄角控制大海

獺窟澳城在縣南海中距縣治四十里四面皆水中竦一山形如獺故名居民稠密皆以舟楫爲利設有一城名爲城仔內昔置屯戍今防守兵皆在城外居駐

輞川澳城在縣東北十里明嘉靖四十一年知縣陳玉成蕭繼美建里人傾貲捐助城周七百餘丈高一丈八尺門四東北小門各一

小岞城在縣東黃坑鋪小岞澳距縣治四十五里明江夏侯建北接黃崎南通大岞相爲犄角極東爲東溟之水通海外諸夷宋參知政事李文會祖居於此明永樂間壘沿海五城置屯兵戍卒以禦寇此其一也

大岞隘在大岞澳孤懸海外近接崇武烽燧相聞上望莆田之南日湄州下瞰晉江之永甯祥芝互爲

猗角山頂天然一洞有小石門入丈餘折而右轉巨石如屏可蔽內外中容數百人一人守之千百人不能入洪武間倭寇作梗不能攻而遁

黃崎隘在縣東香山北十里三面皆海設隘以禦寇山上鹵氣吹盪不生草木宋時產鉄鑛嘗置爐於此煑煉今廢此山又名揚旗因其勢似之

柯寨隘在白水鋪北有柯寨鄉山上設寨與仙遊交界林木叢雜易於藏奸故置寨關以鎮撫之

東坑隘在縣西北樟柿鋪日曝嶺西距縣治三十五里與仙遊隔界地極險阨山下爲東坑寨後鄉昔鄉人避寇故設寨於此

溪西寨隘在縣北音聲嶺旁北接驛坂南連試劍寨惟一門四圍皆砌石堅固今寨內外人居稠密相傳昔人避寇而造此寨

臭塗隘與崇武獺窟烽燧相聞澳險要故設隘以爲聲援

青山寨隘在縣南僞閩將軍張悃立寨於此以禦海寇既沒鄉人廟祀之後傾圮故址猶存明洪武二十一年因重造焉 國朝康熙八年廣界復於阨要處所更設寨台近內地者移置界邊界邊者廊而

固之共寨四墩臺十三青山其一寨也

青山寨 古樓山寨蔡宅鋪

陳坑寨 承天鋪

龍田寨 竹溪鋪

以上四寨

馬山墩臺在二十都左牛坑右馬坂順治十八年遷界設臺墩台

九峯墩台在添奇鋪順治十八年遷界設

南莊墩台與仙遊接壤康熙八年廣界添設寨台

白沙墩台在縣南康熙八年廣界添造

烏西山墩台

獅捲山墩台

巖鼓山墩台

雞母山墩台

東吳埔墩台

承天墩台

後張墩台

白井墩台

前塗墩台

以上十三墩台

海防

崇武澳在縣東南四十五里閩書北接湄洲南接日湖東則距海南峙祥芝泉上游也原設城垣一烟墩炮臺各三崇武汛一員澳東望無際汪洋溟渤兵船逐月巡哨水陸交嚴不虞可備澳中有朝出暮歸小漁船二十餘又往浙採捕魚船十餘凡有船出入皆就近由汛防驗澳外有大蚌山設炮臺三海邊另有峯嶼可通南北往來船與台灣之鹿港對渡近來並無私渡崇武汛原額專駐防兵九十五名大蚌山原額安兵五名防守哨船二

獼窟澳在縣東南四十里閩書島峙海中北障前頭山南縈覆釜南北風皆可行舟大小船入泉州港